


Aruba Dushi Tera

Antes →

Lagoen




Si nos compará e dos portretnan aki nos ta mira cu e vegetacion (matanan) cu tabata tin antes banda di lagoen ta hopi diferente for di esnan di awor. Cadushi y kwihi a haci lugar pa Pal'i coco y ixora. Si nos mira rond di Willem III toren, nos ta mira cu e tempo aya tabata tin un mondi di kwihi.

Lagoen ta un rooi cu ta comunicá cu Rooi Afó. Nan tabata jam Rooi Manoonchi. E tempo aya, ora cu awa jobe duro, e rooi ta pasa su borde y subi tera, causa basta daño. Hasta sa tin caso di hogamento. No lubida cu antes no tabata tin Wilhelmina Park. Lama tabata pasa di boca di e lagoen, pasa dilanti Fort Zoutman y sigui pasa patras di Rekenkamer (antes Magrietschool y Bibliotheek).

Na año 1930 Gezaghebber Wagenmaker a laga traha dam rond di lagoen. E brug chikito na e cruzada di Lagoenweg y Zoutmanstraat a keda cla na Maart di e año ey. Pero apenas un año despues, September 1931, awa grandi a lastré y destruyé. Pronto nan a construí un otro brug y mas fuerte na e mesun lugar. Esaki tey ainda y ta wordo mantení den bon condicion. Riba lagoen for di Fergusonstraat tin 7 brug: Esun di Fergusonstraat mes, Vondellaan, A. Laclé Boulevard, Irenestraat, Zoutmanstraat y L. G. Smith Boulevard.


Si nos sigui compará e portretnan, nos ta mira e cas cu dos dak ta aparecé riba ambos. Esaki ta cas di famia Harms y banda di dje ta e edificio cu tabata Domeinbeheer y awor ta Centrale Accountantsdienst. Na lugar di e mondi di kwihi awor tin edificonan halto y moderno. Lagoen mes a haya un bista nobo y agradable.



Gezaghebber Wagenmaker tabata tin bon bista tempo cu el a cuminsa drecha e vecindario cu awor jama Klip y antes "Heintje Croes". E prome casnan p'ariba di lagoen tabata e cas di Gezaghebber y e casnan den Julianastraat cu tabata casnan pa polis.

ICH

← Awor



CHABALITO

Number 1 - Año 2 - September, 1999 - Afl. 2,=

